

SIARAN AKHBAR

TH SERAH ZAKAT RM2.81 JUTA KEPADA PUSAT KUTIPAN ZAKAT PAHANG

PEKAN, 16 Mac 2017 – Lembaga Tabung Haji (**TH**) hari ini menyerahkan zakat berjumlah **RM2,809,096.64** bagi tahun kewangan berakhir 2016 kepada Pusat Kutipan Zakat Pahang dalam satu majlis ringkas di pejabat Majlis Ugama Islam dan Adat Resam Melayu Pahang (MUIP), Pekan, Pahang.

Kebawah Duli Yang Maha Mulia Pemangku Raja Pahang, Tengku Mahkota Abdullah Al-Haj Ibni Sultan Ahmad Shah Al-Musta'in Billah merangkap Yang Dipertua MUIP telah berkenan untuk menerima pembayaran zakat ini yang dipersembahkan oleh YBhg. Prof. Emeritus Tan Sri Dato' Dr. Abdul Shukor Husin, Ahli Lembaga Pengarah **TH**. Pembayaran zakat bagi negeri Pahang ini mencatatkan peningkatan sebanyak **1.04%** berbanding **RM2,780,235.93** (2015).

YBhg. Prof. Emeritus Tan Sri Dato' Dr. Abdul Shukor Husin berkata sebagai sebuah institusi Islam, **TH** menekankan aspek kelestarian ekonomi ummah dan pembayaran zakat berperanan mempertingkatkan kebajikan masyarakat dan membantu meningkatkan kegiatan ekonomi golongan asnaf.

"TH memastikan pembayaran zakat kepada Pusat Pungutan Zakat di seluruh negara dilaksanakan sebelum suku tahun pertama berakhir agar wang tersebut dapat dimanfaatkan sepenuhnya oleh golongan asnaf miskin yang layak, dan seterusnya membantu ke arah kemampanan program-program zakat yang bakal dilaksanakan oleh Pusat Pungutan Zakat Negeri-negeri. Saya menyarankan syarikat-syarikat korporat dan persendirian yang lain membayar zakat kepada Pusat Zakat Negeri-negeri agar mereka dapat melaksanakan program secara lebih terancang dan berimpak tinggi kepada golongan asnaf," kata beliau.

Jumlah keseluruhan pembayaran zakat **TH** 2016 terus mencatatkan peningkatan sebanyak 1.69% (RM60.3 juta) berbanding tahun sebelumnya, RM59.3 juta (2015). Dengan kenaikan ini, **TH** akan meningkatkan lagi program pengagihan zakat secara terus kepada asnaf-asnaf di seluruh negara melalui Program Iqra', Program Ehsan, Program Baiti dan Program Mobiliti. Program-program tersebut diharapkan dapat memberi manfaat secara terus kepada lebih ramai golongan sasaran.

Turut hadir pada majlis tersebut adalah YDH Orang Kaya Indera Pahlawan, Dato' Sri Wan Hj Abdul Wahid Bin Hj. Wan Hassan, Timbalan Yang Dipertua MUIP merangkap Pengerusi Pusat Kutipan Zakat Pahang; YH Dato' Hj Halidan Md Daud, Pengurus Besar Kanan Pusat Kutipan Zakat Pahang, Ahli-ahli Lembaga Pengarah MUIP, pegawai-pegawai Pusat Kutipan Zakat Pahang dan **TH**.

-Tamat-

Lembaga Tabung Haji

Lembaga Tabung Haji (**TH**) adalah sebuah badan berkanun yang diperbadankan di bawah Akta Lembaga Tabung Haji, 1995 (Akta 535). Aktiviti utama **TH** adalah dalam pengurusan haji, tabungan dan pelaburan. Antara sektor pelaburan terasnya adalah kewangan Islam, perladangan, hartanah, pembinaan, teknologi maklumat, minyak & gas, hospitaliti, perkhidmatan dan makanan halal. **TH** mempunyai 124 buah cawangan di seluruh negara dan satu cawangan di Jeddah, Arab Saudi. Untuk maklumat lebih lanjut mengenai perkhidmatan Tabung Haji, sila lawati www.tabunghaji.gov.my atau hubungi Tabung Haji Contact Centre dialian 03-6207 1919.